

ЛИТЕРАТУРА

Гожъяськон - лулдэ сётон...

Маин висъяське национальной литература

Елена МИННИГАРАЕВА

Удмурт кун университетысь В. Журавлёв нимо библиотеказын ортчиз Москваысь тодмо писателен, «Литературная газета» изданилэн валтйсь редакторезлэн воштйсеныз Анастасия Ермаковаен пумиськон. Жутэмын вал литератураен герзаськем пöртэм ужпумьёс.

Умой ке но, лултэм

Ужрадэ пырыськызы шаерысьтым тодмо литературоведьёс, писательёс, журналистёс. Пумиськонэз нуиз Удмуртиысь калык писатель Вячеслав Ар-Серги. Со пусйиз Анастасия Ермаковалэсь ассэ быдэсак литературалы сйземзэ, пöртэм калыкьёслэн литературассылы саклык висъямзэ. Солэн юрттэмезъя «Литературная газетаын» туннэ нуналлы Удмуртиысь 50 пала писательёслэн но литературоведьёслэн ужьёссы печатласькызы ни. Алигес «Литературная газетаын» печатламын 6 авторьёсмылэн ужьёссы. Озы быдэс Россиысь но кунгож сьöрысь 115 сюрс пала лыдзисьёс («Литературная газеталэн» туннэ нуналлы тиражез) Удмуртиысь литератураен тодматскизы.

«Литературная газеталэн» 10-лэсь трос проектёсыз. Пöлысьтызы одйгез - «Многоликая Россия» - 10 ар çоже улонэ пыча ни. Анастасия Геннадьевна пусйиз:

- Национальной литература висъяське улэп луэмез. Тон сое лыдзиськод но пушласянь воштйськыськод. Угось со огшоры уж (ремесло) гинэ öвöл, со искусство. Жаль, берло дыре Россиысь огъя литератураез учкиськод ке, отын уг тырмо малпаськон, инкуазез, котыр улонэз гажан, яратон. Гожъяськысьёс трос, гожъясько умой, литературалэсь куроньёсэз тодо - зэмоз мастерьёс. Но произведениосазы лулыз, шунытэз öвöл. Мар понна гожтэмын? Валантэм. Огшоры лултэм текст но тйни. Мон али уг вераськы графоманьёс сярсь. Соос котьку вал но котьку акыльтылызы асьсэ гожъямьёсынызы. Ма кароно? Нош ма карод гужем тэбинись чибиньёсын? Озы ик артэ



Тусуктйз Евгений ЛЕКОМЦЕВА

улыны, одйг-ог бордысьтыд улляны-шонаськыны тыршоно ни.

Дышыны луэ...

Аслаз Анастасия Ермаковалэн литературае сюресэз капчи вылымтэ. Писатель 1974-тй арын Москваын вордйське, школазэ йылпумъямез бере дышетскыны Горький нимо литературная институтэ вამыштэ. Но конкурс пыр уг поты. Туж жожоме но мынэ Москваысь ик металлургической институтэ. Сое йылпумъя гинэ, со аре ик пыре литература институтэ. Тйни озы, литература, творчество котыре кытйськысь мылкыдыз дыр ортчемъя но уг пуксьы.

Пумиськон дыръя писатель туж шунытэн тодаз вайиз литинститутысь дышетйсьезлэсь, кылбурчылэсь но профессорлэсь Эдуард Балашовлэсь занятиоссэ:

- Со сокем ик бадзым саклык öз висъялля гожъяськон техникалы. Малпалляз, солы так но дышыны луэ. Трос вералляз произведенилэн пуштроез сярсь: малы тон сое гожтйськод?

Литературовед Вера Пантелеева ас вакытаз озы ик Москваысь литинститутын кылысь кылэ берыктйсье дышетскиз, со но Э. Балашов профессорез туж шунытэн тодаз вае. Со тунсыкъяськыз:

- Нош Эдуард Балашов маке вералляз-а удмурт кылбурчи Флор Васильев сярсь? Пöртэм литера-

Москваысь писатель А. Ермакова.

тураосты кылысь кылэ берыктон сярсь?

- Бен, со вералляз Флор Васильев но солэн кылбурьёсыз сярсь. Текстёсты берыктон бордын ужаку, шуылйз, тырше асьтэды автор интые пуктыны, солэсь шокамзэ, курактонзэ валаны. Нош сыçе шöдонды öвöл ке, берыктон борды эн ик басьтйське, - шуиз Анастасия Геннадьевна.

Анастасия Ермаковалэн тужгес тодмо произведениез - «Пластин» роман. Со сйземын Россиысь нылпи юртёсын будйсь пинальёслы: куштэм пинальёс адзöнзэс асьсэос öз бырье, соос та улоньы - котькызы пыръяно пластилин юдэсьсэ выллем... Малы таче тема быръемын вал? Писатель кöня ке ар çоже ужам нылпи юртын, отысь адзем суредьёс, учырьёс сюлмысьтыз кошкыллямтэ ни - озы вордйськем роман.

Кинлы сётйське премия?

Тодмо кылбурчи но прозаик Сергей Жилин юаз: Россиын литература арен-арен, интыен-интыен висъяське вал. Кылсярсь, 1960-тй-1970-тй аръёсы Вологдаын туж зол жутскон вал, кыçе ке вакытёсы - Иркутскын, со бере - Владивостокин. Нош али кытын ке литература пöзе-а?

Анастасия Ермакова верамъя, литературалэн зечлыкэзъя, ку-

жымезъя висъясько Татарстан, Башкортостан но Удмуртия. Кылсярсь, удмурт литература - со ас пушказ кошкытйсь, малпаськытйсь.

Тодосчиос Александр Вахрушев но Александр Шкляев шугъяськемзэс веразы: нош кызы «Литературная газета» шоры туалла власть учке? Мар чотын газет улэ?

- Милемлы Печать федерал агентств но Москва городлэн Правительствоез юртто, - шуиз А. Ермакова. - Зэм, коньдон öжыт висъяське, медам быре шуыса гинэ. Огласянь, валамон: «Литературная газетаез» куашкатон - со Третьяковской галереяез тус-тас карем кадь луоз. Мукет ласянь, шугъяськытэ туалла писательлэн адзöнзэ. Писатель луон - со туж секыт уж. Соин ик 3-4 толэзьлы чаклам субсидиос ке но луыны кулэ. Паймымон: Россиысь профессиослэн реестразы кыçеез но уж öвöл - мармелад тырись (укладчик мармелада) гинэ но вань, нош писатель пыртымтэ...

Россиын писательёслэсь улонзэс кöня ке шумпоттыны кулэ кадь пöртэм конкурсьёс, премиос. Но сокем-а капчи соосты басьтыны? А. Ермакова öз ваты: Москваын сётъяськысь тросез премиос - ворсам тусовкаос выллем. Палэнысь адями со премилы аслэсьтыз гожтэмзэ сётйз ке, сое уз но учке, дыр. Но та уг вера на, премиосты басьтэм произведениос лябесь шуыса. Конечно, отын зол но тунсыко произведениос луо.

- Шуом, тунсыко произведениоссы Захар Прилепинлэн, Сергей Шаргуновлэн. Но соос тодмо писательёс ни. Нош гожъяськысь тодмо öвöл ке, бадзым премия бастонлы оскон пичи. Асьтэос малпалэ ай, конкурсэ 100-лэсь трос роман вуэ, комиссия пырись адямиос ваньзэ лыдзыса но уг вутто. Но оскем потэ, зэмоз литература озы но калыке вöлмоз, - шуиз писатель.

А. Ермакова öпкелиз: та дыртйсь улоньы, уж, семья котырын бергаса, творчестволы дырыз туж öжыт кыле. Нош вис шеде ке, малы ке кыл но уг мыны. Угось кызы шуиз вал башкир кылбурчи М. Карим, произведениез гожтон понна гань-гань улон дырыд запасэн луыны кулэ... ❀❀❀

КИНО

Бадзым дуннеын зоскыт

Анастасия ШУМИЛОВА

Туэ кuartолэзе Каннись кинофестивалын Россиысь егит режиссерлэсь Кантемир Балаговлэсь «Дылда» кинозэ (16+) «Особый взгляд» программаын возматйзы. К. Балаговлы «Устойе режиссер» ним сётйзы. Со сяна, фильм Кинопрессалэн калыккуспо федерацияезлэсь приззэ утйз.

«Дылда» вера 2 егит кышномуртгёс сярсь - соос 1945-тй арын фронтысь Ленинградэ берытско. Киноз Россиын возматйны кутскозы 20-тй июньысен.

К. Балаговлэн Канннынимыз ворекъяз ини - 2017-тй арын «Теснота» кинозэ (16+) озы ик «Особый взглядын» возматйзы. Соку сое устойчив кутскысь режиссер нимазы.

К. Балагов вордскиз 1991-тй арын Кабардино-Балкарийсь Нальчик карын. Тодмо режиссер Александр Сокуров огдыре татысь университетын режиссерьёслы мастерской нуиз. К. Балаговез 3-тй курсэ кутйзы. А. Сокуровлэн фондэз ик юрттйз К. Балаговлы «Теснотаез» лэсьтыны.

Кинояз режиссер вордскем карезлэсь 1990-тй аръёслэн пумазы улонзэ возматэ. К. Балагов верамъя, сюжетсэ со улоньысь басьтйз: Чечняын война дыръя дораз та учыр вылэм. Нальчиклэн оглюкетаз ог-огзылы матын уло еврей семьяос. Одйг семьяысь пизэс лужкало, со понна уксё куро. Милиция вазыськыны толкез öвöл - еврейёслы татын нокин уз юртты. Семьялы тодмооссы уксё сётйны дась, но со понна нылзэс курало. Нош 24 аресъем Илана бызёнлэсь пега - со гаражын ужа, пиосмурт дйсен ветлэ. Эшшо со кабардин пилы синмаськемын.

«Теснотаез» учкемъя дуннелэсь зоскыт луэмзэ шöдыны кутскыськод. Геройёс ялан четлыкын кадь - камера соос шоры öс кусыпгёс пыр, сюбег коридоргёс пыр учке. Калыклэн сямьёсыз нимаз адямиез жокато кадь. Паськыт кунамы калыкгёс ог-огзылы улыны люкетто. Войналэн чилекъямез, гудыриен кылйськыса, омыреш шуэръяськонэн тырмытэ - шоканы секыт. Ма, одйг семьяысь матысь адмиослы но ог-огзы вöзын зоскыт луэ.

«Теснота», ог 2 час çоже çоксузыгытса, учкисез пумаз жалья но инкуазь суредьёсын эмъя. Но кемалы уг дыр, - жоге улон геройёсты вильысен эгесалоз. ❀❀❀